

Uunga siunnersuut: Nioqqutissanik eqqussuineq annissuinerlu pillugit Inatsisartut inatsisaata allangortinneqarneranik Inatsisartut inatsisaat**Saqqummiussissut**

(Aningaasaqarnermut Aatsitassanullu Naalakkersuisoq)

Siullermeerneqarnera

Nioqqutissanik eqqussuineq annissuinerlu pillugit Inatsisartut inatsisaata allangortinneqarneranik Inatsisartut inatsisaat Naalakkersuisut sinnerlugit matumuuna saqqummiutissavara.

Akilerartarnermut Aqutsisoqarfiup angalasut nioqqutissanik Kalaallit Nunaannut eqqussuinerat, nioqqutissanik eqqussuineq annissuinerlu pillugit maleruagassat maannamut atuuttut naapertorlugit nakkutigisinnaavaa. Nakkutilliinerup ilaatigut kinguneraa Akilerartarnermut Aqutsisoqarfiup piumasarisinnaammagu ilaasunik angallasseqatigiiffiit paasissutissat pigisatik, matumani ilanngullugit inuttat ilaasullu kinaaneri, nassatat il.il. pillugit paasissutissat, umiarsuit timmisartulluunniit akitsuuteqarfiusumut tikinneranni Akilerartarnermut Aqutsisoqarfimmud tunniutissagaat. Tamanna ilaatigut pisarpoq ilaasut allattorsimaffiunik tunniussinikut. Allattorsimaaffiilli ilaanneeriarlutik amigaateqarlutilluunniit nutaanngilivallaarsimasarput – tamannalu Akilerartarnermut Aqutsisoqarfiup nakkutilliiniarneranut akornutaasarpoq.

Akilerartarnermut Aqutsisoqarfik siunnersuutip kingunerisaanik piumasaqarsinnaalissaaq ilaasut il.il. pillugit paasissutissanik, ilaasunik angallasseqatigiiffiit billetsinut/inniminniineranut nalunaarsuiffiini mittarfimmi toqqaannartumik qarasaasiakkut takunnissinnaanissamik. Periarfissaq taanna nakkutilliinermik sunniuteqarnerulersitseqataallunilu pitsanngorsaaqataasaaq. Aamma ilutigisaanik periarfissaalissaaq paasissutissat nakkutilliinermi pisariaqartut taamaasa tunniunneqarserlugit timmisartut mittarfimmi tikiffimmi uninngatinneqarsinnaalernissaat.

Aammattaaq siunnersuutip kinguneraa angalasunik scannerilluni misissuisinnaanerup inatsimmi erseqqissarneqarnissaa. Inatsimmi aalajangersakkat maanna atuuttut inunnik scannerilluni misissuisinnaanermik killiliisuunngillat, inuk inatsisinik unioqqutitsilluni nioqqutissanik il.il. timimi iluanut toqqortuisimasutut ilimagineqarpat. Inatsisitigulli isumannaatsuunissaq pissutigalugu kissaatiginartinneqarpoq taamaaliorinnaanerup inatsimmi erseqqissumik allassinissaa.

Kiisalu inatsit siunnersuutikkut aaqqiivigineqassaaq, tassa aningaasanik tigorianaannarnik allakatigut imaluunniit inunnut allanut nassartillugit Kalaallit Nunaannut tassanngaanniilluunniit nassiunneqartunik nakkutilliinissaq siunertaralugu. Aningaasat tigorianaanaat amerlasuut inunnut allanut nassartillugit nassiunneqartut nalunaarutigineqartussaataalernissaat kiisalu tamanna eqquutsinneqanngitsillugu nassiussanik arsaarinnissuteqartoqarsinnaanissaa siunnersuutigineqarput.

Inatsisissatut siunnersuut tassungalu oqaaseqatit naggataatigut innersuussutigaaqka.

Siunnersuut Naalackersuisut sinnerlugit matumuuna Inatsisartunut suliassangortippara, aam-
malu Aningaasaqarnermut Akileraartarnermullu Ataatsimiititaliami suliarineqareerpat aappas-
saaniigassangortillugu.